


Ҳолвами ёки пишлоқми?



17:00 / 01.08.2022 3196

Таътилга берилган муддат ниҳоясига етиб, юртига қайтиш учун бир йигит самолётга чиқди. Йигитнинг ёнида содда, кекса бир онахон ўтиради. Самолёт манзил сари парвозни давом эттирас экан, йўловчиларга таом тарқатилди. Ҳар бир таом ёнида бир бўлак оқ рангли ҳолва қанд ҳам бор эди. Кекса онахон ҳолва идишни очдилар-да, бир бўлак нон олиб, у билан ҳолвани емоқчи бўлдилар. Аслида онахон ҳолванинг ранги оқ бўлгани учун уни пишлоқ бўлаги деб ўйлаган эдилар. Унинг ҳолва экани маълум бўлгач, ўзларини ноқулай ҳис қилиб, ёнларида ўтирган йигитга оҳиста қарадилар. Йигит бўлиб ўтган ҳолатни кўрмаганга олди. У ҳам ҳолва турган идишни очиб, онахон каби емоқчи бўлди. Буни кўрган онахон кулиб юбордилар.

Шунда йигит: «Онахон, нега бунинг пишлоқ эмас ҳолва эканини менга айтмадингиз?», деди.

Онахон: «Мен ҳам сенга ўхшаб уни пишлоқ деб ўйлаган эдим», дедилар.

Аслида йигит ўша ҳолванинг пишлоқ эмас, ҳолва эканини, бу сафар ҳам бир муддат ўтиб ниҳоясига етишини, ёнида ўтирган аёл содда бир кекса онахон эканини билар эди. Фақат ёнида ўтирган кекса аёлнинг қалбини ўйлади ва уни ноқулай вазиятдан чиқаришга Аллоҳнинг иродаси билан уринди. Буни кўнгил олиш дейилади.

Суфён Саврий раҳимаҳуллоҳ: «Мен кўнгил олишдан кўра, улуғроқ буюкроқ ибодатни кўрмадим» деганлар.

Инсонларнинг ҳис туйғуларидағи ноқулайликларнинг ислоҳ бўлишига, инсонларнинг қалбларидағи озор берувчи нарсаларнинг аришига сабабчи бўлишнинг савоби, уларнинг йўлларидан озор берувчи нарсаларни четга олиб қўйишнинг савобидан кам эмас.

Шундай экан, одамларнинг кўнглини олайлик, қалбларидағи жароҳатларга малҳам бўлайлик, ҳис туйғуларининг риоясини қиласийлик, одамларга гапираётганимизда ширин сўзларимизни аямайлик, улар билан муомала қилганимизда мулойим бўлайлик, ҳеч кимга озор бермайлик.

Ҳаммамиз ҳам бу дунёдан бир кун кетамиз, ортимиздан фақат изларимиз қолади. Биз кетганимиздан сўнг, бизни ёдга олганларида хотирамиздан хушбўй ифорлар таралсин. Одамларга ичимиздаги самимий туйғуларимизни ва болдек ширин сўзларимизни илинайлик. Бошимизга қандай ташвиш тушган бўлишига қарамай, доим инсонларга очик чехра ва табассум билан юзланайлик.

Аллоҳ таоло бизларни инсонларнинг қалблариға илиқлик ва шодлик олиб кирадиган бандалардан айлаб, дилозорликдан асрасин!

Манба: «Ал-Мутанаббий» саҳифасидан

Нозимжон Ҳошимжон таржимаси

Хуршид Маъруф тайёrlади